

## Rückblick 2019

De Jahresbricht chünd hür chli andersch dehär, ich hoffe zue lose fallt üch nid all zu schwär.

Z Brichte gits wieder allerlei, drum chömid ihr hüt nid so frueh hei.

I de Pfarri isch so einiges gloffe, und ich bi uf etlichi Aläss gstosse.

Für s Projekt vom Pater Ben hend mir gsammled, und ihr hend tüüf is Portmonai glanged.

10'000.- Franke hend ihr gspänded, und Pfarri de Bertrag voller Stolz gsänded.

De Chillechor hed im Dezember uf em Dorfplatz gsunge, und üs so i Wiehnachtsstimmig brunge.

Au d Stärnsinger hend sich wieder uf de Wäg gmacht, und singend de Säge i d Hüüser bracht.

3'000.- Franke hend sie döffe sammle, es härzlichs Danke a allne.

D Sigristin Theres hed gfiired en Geburtstag, nur welle isch jetzt d Frag.

Iehr mögids chume glaube, de 70. Zigscht da möchid ihr Auge.

De Brühlhart Franz isch hür worde 80. Jahr, und hed gross gfiired isch doch klar.

Als Weibel hed är sich la pensioniere, und mir hend das müesse akzeptiere.

De Fischlin Thomas hed das Amt de über no, da drüber sind mir mächtig froh.

D Chille isch greiniged worde im März, doch das hend ihr sicher alli gmerkt.

Am Palmsunntig heds wieder ghä feini Suppe, kocht und serviert vo de Aperogruppe.

Am Muerttertag hender gseh, isch Musiggellschaft nid gsi uf em See.

Sie hend üs defür i de Chille musicalisch begleited, und üs so en grossi Freud bereitet.

Ich ha au verno, a Pfingscht sind s vom Patoralrumm uf Walchwil cho.

De Gottesdienscht sigi gsi schön und firlich, und de Apero sehr riichlich.

**De Pfariiusflug he üs richtig Dütschland bracht, d Haseloch Marlis heds möglich gmacht.**

**In Bad Säckingen hend mir s Fridolinsmünschter bsuecht, und uf em Markt nu Spangle gsuecht.**

**In St. Blasien isch mer go trinke und ässe, und nachhär ehrfurchsvoll i de wunderschöne Domchille gsässe.**

**S Pfarrteam hed au es Reisli gmacht, und e tolle Tag uf hoher See verbracht.**

**Murte isch gsi s Ziel, sie hend erläbt und gseh ganz viel.**

**D Blauring Meitli sind als Wikinger is Lager uf Schwarzegg, und sicher nid immer so frueh is Bett.**

**Es Jubiläum isch au nu z fiire gsi, Bodis Petra isch scho 20. Jahr bim Blauring debii.**

**S Frohe Alter ischs Theater Muethatal und vieles meh go bsueche, und zwüschedure heds zur stärcig ghä Kaffe und Chueche.**

**E hufe Lüt sind ufs Alpli gloffe, und det uf de Ralf und sis Team troffe.**

**Ded hed de Ralf sin Gottesdienst abghalte, wo sehr schön und firlich isch gsi gschtaltes.**

**De Chillerat isch au uf d Reis gange, dasmal sogar ohni Autopanne.**

**Defür hends üses Auto fofogafiert, doch zum Glück isch nüd schlimmers passiert.**

**Is Burgund hed üs die Fahrt gfuehrt, und d Maria hed das ganzi organisiert.**

**En Wiisafari mit Degustation hend mir nu gha, doch de Wii hend mir gäre dete gla.**

**S ässe isch jedoch gsi mega toll und bsunders fein, und gseh hend mir au nu allerlei.**

**Maria mir hend döffe gnüsse 3 tolli Täg , nu einisch es härzliche Dank uf dem Wäg.**

**D Frauegmenschaft hed i dem Jahr au wieder e hufe Aläss gmacht, z.B hend sie uf de Insel Mainau bestund die schöni Bluemepracht.**

**D Jodler sind au i dem Jahr am Bärgfaäsch und Chilbi gsi debii, wunderschön ischs wieder gsi.**

**Im September isch mer bim ne Lagerfür zäme gsässe, hed gsunge und e Grillade gässe.**

Mier wettid uf dem Wäg allne Danke säge , wo üses Pfarrilaäbe mit ihrne Aläss duend beläbe .

Es isch eifach immer wieder schön, üch amne Pfarri Alass z gesh.

Als grosse Dank hend mir mit üch döfe i de Aesch am Friiwillige Alass go ässe,zum Zeiche das mir üchi Isätz nid duend vergässe.

E schöne Abig hend mir zäme mit üch bi Spiess und trank verbrunge, und einigi hend nu zünftig s Tanzbei schwunge.

Z Brichte gäbds nu vieles meh, doch duend üch vo mim gschwäzt sicher scho d Ovre weh.

Bim aschlüssende Apero gits de nu Käs und Wurscht, und sicher au öpis gäge Durscht.

Jetzt wünschid mir üch ganz e besinnlichi Adventsziit, denn bis zur Wiehnacht isch jetzt nüme wiit.

Für s nüe Jahr wünschid mir nur s bescht, de Kari übernimmt jetzt wieder für de Rescht.